

1-1-1669

Constitutiones selectae: 1669

Recommended Citation

"Constitutiones selectae: 1669" (1669). *Constitutions and Rules*. Paper 12.
http://via.library.depaul.edu/cm_construles/12

This Article is brought to you for free and open access by the Official Documents at Via Sapientiae. It has been accepted for inclusion in Constitutions and Rules by an authorized administrator of Via Sapientiae. For more information, please contact mbernal2@depaul.edu.

CONSTITUTIONES SELECTAE

[VERSIO 1669]

1° Superior Generalis Congregationis Missionis erit in officio perpetuus et omnimodam in tōtam Congregationem, id est in singulas domos, res et personas Superioritatem atque auctoritatem habebit, eo modo temperatam qui infra declaratur.

2° Tres vel quatuor Assistentes illi adjunget Conventus Generalis, atque Admonitorem dabit, omnes pluribus media parte suffragiis eligendos, quorum officium usque ad electionem alterius Superioris Generalis durabit ; Assistentium autem pares erunt Generalem ipsum opera et consilio juvare in regimine Congregationis, ita tamen ut facultas decernendi quae agenda fuerint, sit penes ipsum Superiorem Generalem, exceptis casibus infra exprimendis.

3° Illius erit domos omnes et personas Congregationis regere, Visitatores et praefatae Congregationis tam Secretarium quam Procuratorem, Superiores Domorum caeterosque officiales ordinarios, Assistentibus suis et admonitore exceptis, commissarios etiam qui ordinarii officiales non sint instituere, quibus omnibus eas impertietur facultates quas impertiendas judicaverit. ipsi vero ad reddendam ei suae administrationis rationem tenebuntur.

4° Ex quo fuerit a Conventu Generali electus jus habebit, tum in ipso Conventu, tum in aliis quibuscumque, duo ferendi suffragia sive secreta illa fuerint, sive non secreta, atque praerogativam in paritate suffragiorum non secretorum ; si quid tamen ab ipso et à quibusdam a Conventu deputatus suffragiorum non secretorum via definiendum erit, unico tantum cum praerogativa in paritate gaudebit. In electione quoque duorum Assistentium et quatuor Deputatorum ad seligenda proposita unicum habebit suffragium, sed sine praerogativa.

5° Licet jus plenum decernendi et statuendi quae ad Congregationis progressum felixque regimen conducere videbuntur apud Conventum Generalem resideat concurrente majori suffragiorum parte : poterit tamen quoque Superior Generalis ordinationes et statuta condere, modo Decretis Conventuum Generalium non repugnent, quae abrogare vel immutare nullatenus poterit, nisi de consensu Generalis Conventus, modo etiam licita sint et honesta nec Sacris Canonibus adversantia, aut contraria Constitutionibus Apostolicis, Bullis seu Brevibus Summorum Pontificum quibus praefatae Congregationis Institutum, Constitutiones, Regulae et munia declarantur, aut confirmantur, nec speciatim his articulis quos vel leviter immutare nec Superiori nec Conventui Generali licebit. Ordinationes autem et statuta hujusmodi a Superiore Generali edita observanda erunt, donec Conventus Generalis aliud decreverit, penes quem est potestas vim illis detrahendi aut etiam addendi ut in posterum obligent.

6° Idem Superior Generalis in Congregationem admittere poterit quos idoneos existimaverit, et indignos post emissa vota dimittere, si retinent non posse absque magno illius damno ipse et ejus Assistentes ad plura suffragia judicaverint, ita tamen ut ipsi competat unicum suffragium cum

praerogativa in paritate.

7° Licebit ei quoslibet Contractus inire; in rebus tamen maximi momenti de consensu suorum Assistentium ad plura nimirum suffragia cum sua ipsius praerogativa in paritate.

8° Admittere poterit de consensu Ordinarii foundationes et Domos non tamen eas alienare, abolere, aut alio transferre nisi de consensu Conventus Generalis, servatis semper de jure servandis. Quod si dissolvendi aliquam Domum aut foundationem deserendi necessitas tanta urgeat, ut Conventus Generalis expectari non possit, tunc res decernetur iudicio ipsius Generalis, Assistentium, Visitorum qui fuerint in Europa, Secretarii etiam Congregationis et Procuratoris, aut saltem majoris ipsorum partis, servatis ut supra de Jure servandis.

9° Dignitates Ecclesiasticas absque consensu Conventus Generalis acceptare non poterit, nisi summus Pontifex id in virtute sanctae oboedientiae praecipiat.

10° Penes illum erit facultas Conventum Generalem convocandi, ipsum dirigendi et Congregatos de consensu tamen ipsius Conventus dimittendi.

11° Porro Conventus Generalis ob causas quascumque congregatus, Superiori Generali superior erit; praetereaque Congregatio in eundem auctoritatem potestatemque habebit, in duobus potissimum casibus, nempe si inutilis foret ad gubernationem, vel gravissimum aliquod peccatum externum committeret; primo enim casu, Congregationis erit substituere illi Vicarium Generalem, si ipse eum nominare non posset aut nollet; secundo vero casu qui tamen speratur non eventurus, potest eadem Congregatio eum deponere; quod quidem ultimum ut legitime fiat, suffragia duas tertias partes excedere debent ; ut vero substituaturs illi Vicarius, satis erit si major pars Congregatorum in id consenserit.

12° Defuncto autem Superiore Generali, ejus erit quem ipse in Vicarium Generalem nominaverit, vel primi Assistentis, si Vicarius nominatus non fuerit, aut officio suo fungi non possit, Congregationem regere usque ad electionem novi Superioris Generalis; denique pro ejusdem electione Conventum Generalem intra sex menses, nisi gravis necessitas dilationem aliquam exigeret, convocare, eidem praesidere donec Superior Generalis fuerit electus.

13° Praeter praedictum casum electionis, Conventus Generalis celebrabitur in casibus sequentibus: 1° Singulis duodecim annis post ultimum Conventum Generalem. 2° Quotiescumque Superior Generalis ipsum ob res magni momenti indicendum judicaverit. 3° Si assistentes cum Visitoribus qui sunt in Europa ipsum esse necessario cogendum ad plura suffragia censuerint in causa depositionis ut supra. 4° Si ipsemet Generalis, ejus Assistentes, Congregationisque Secretarius et Procurator cum Deputatis qui sexto anno post ultimum Conventum Generalem a Singulis Europae Provinciis mittuntur, ipsum cogendum esse pluribus suffragiis decreverint.

14° Ob quamcumque vero causam celebretur, intererunt ei, et jus suffragii habebunt Superior Generalis, nisi forte de ipsius depositione ageretur, sive Vicarius itidem Generalis, Assistentes, Visitores seu eorum loco Vice-Visitores Congregationis tam Secretarius quam Procurator, et duo sacerdotes ex singulis Provinciis, quos legitime a Conventibus Provincialibus pluribus

suffragiis electos esse constabit, si tamen Conventus habeatur pro eligendo Superiore Generali, praedicti Secretarius et Procurator Congregationis intererunt ei tantum post peractam dicti Superioris Generalis electionem, nisi alio titulo ei interesse debeant.

15° Non proponentur Conventui Generali nisi ea quae vel Superior Generalis proponere voluerit, vel proponenda censuerint ad plura suffragia ipse scilicet Superior Generalis, duo ejusdem Assistentes, et quatuor de numero Congregatorum ad plura suffragia electi.

16° Procedetur per suffragia secreta ad electionem Superioris Generalis quae mediam partem necessario excedent, ut valide electus habeatur; quod si post quinque scrutinia electio facta non fuerit, totum illud negotium, si duae saltem tertiae partes electorum in id consenserint referendum erit ad quinque compromissarios, deinde vero si opus fuerit, etiam ad plures modo omnes sint de Congregatis et numero impares praedicti autem compromissarii eligendi erunt ad plura media parte suffragia secreta, et ipso quoque Superiorem Generalem eligent ad plura medietate similiter suffragia itidem secreta, ex iis tamen qui saltem quatuor suffragia in ultimo Scrutinio habuerint. Porro tam compromissarii quam caeteri electores antequam suum suffragium dent pro eligendo Superiore Generali, juramentum praestabunt de digniore eligendo, nec eligere poterunt nisi unum ex numero sacerdotum qui duodecim, ut minimum, annis completis post emissa vota in Congregatione vixerint.

17° Ut in re tanti momenti omnis ambitus tollatur occasio, excommunicationis latae sententiae paenam incurret quivis ex Nostris qui ab obitu Superioris Generalis cum aliquo externo egerit eo fine, ut sive sui sive alterius promotionem ad Generalatum, aut ab eo alterius exclusionem procuret, vel quocumque modo electionis libertatem impediatur aut perturbet; [eidem paenae subjacebit qui non detulerit aliqui ex quinque iudiciis de numero electorum in causa ambitus deputatis, quem in aliquo ex praefatis casibus deliquisse sciverit](#); item qui aliquem ex Nostris ad suam ipsius electionem ambitiose sollicitando Generalatum affectaverit, vel qui ad ambientis inductionem pro ejusdem electione quempiam ex Nostris sollicitaverit.

18° Immediate vero ante electionem Vicarius Generalis congregatos absolvet in quantum opus fuerit ab omni vinculo excommunicationis, suspensionis et interdicti et a quibusvis aliis sententiis, censuris et poenis ad effectum legitimae electionis duntaxat; [et cum eis dispensabit super irregularitate quavis](#), statimque ipso Vicarius idem absolutionis [et dispensationis](#) beneficium et ad eundem effectum a Congregatorum antiquissimo ratione receptionis in Congregationem percipiet.

19° Post legitimam promulgationem electionis Superioris Generalis factae, vel ab omnibus electoribus, vel a Compromissariis ut supra, omnes acquiescere tenebuntur, nec ulli fas erit suffragium suum revocare, aut novam electionem tentare, aut contra ejusmodi electionem quocumque pretexto protestam.

20° Quandocumque tandem habeatur Conventus Generalis, si contingat eo quavis de causa indicto, vel jam coacto, vel statim post ipsum dissolutum Superiorem Generalem, vel aliquem ex ejus Assistentibus, vel ipsius Admonitorem e vivis decedere, vel si accedat Superiorem Generalem in eo statu esse qui Vicarium exigit; in iis casibus electi a Singulis Provinciis pro Conventu Generali jus habebunt absque nova convocatione, vel deputatione Conventuum

Provincialium eligendi novum Superiorem Generalem, vel Vicarium, vel Assistentem, vel Admonitorem. Idem jus habebunt pro sola electione Superioris Generalis, etiam post aliquorum discessum, si facile et intra breve tempus revocari possint.

Source: Schema Constitutionum Congregationis a Missione approbationi Conventus Generalis XXXI subjiciendum, *Paris, 1947; pp. 103-105; "Mutationes circa supra scriptas constitutiones factae à Praelatis quibus SS N.P. earum revisionem mandavit," in "Circulares aux Visiteurs 1661-1846. Manuscript." Called Vol. F., in ACM Paris, pp. 18-19.*

NOTE:

Text in blue represents the original text as submitted in 1669, but revised by the cardinals in 1670. (The order of words in § 5 has also been changed in some way, as well as in § 13.)

[John E. Rybolt, C.M., December 2006]